



UNIVERSITÄTS-
BIBLIOTHEK
PADERBORN

Universitätsbibliothek Paderborn

Arnoldi Corvini à Belderen J. U. D. Jus Canonicum, Per Aphorismos Strictim Explicatum

Corvinus van Beldern, Arnold

Amstelodami, 1663

De Episcopis, summo Pont. & Cardinalib.

urn:nbn:de:hbz:466:1-10591

TIT. III. DE EPISCOPIS, &c. §

Sunt vel *Regulares*, seu *Religiosi*, sic in specie dicti, quod se omnium maximè religioni devovisse censentur; cum monasteriorum angustiis circumscripti, sub unius Prælati nutu, propriis omnibus sponte exuti, & continentiam professi, degant: vel *Seculares Clerici*.

Horum alii sunt in *Sacerdotio*, & vel in *altiori gradu*, seu *ordine*; vel in *inferiore*: alii in *Sacris*. alii *nec in Sacerdotio, nec in Sacris. d. c. duo sunt. 12. qu. 1.*

In *Sacerdotio*, & *altiori ordine* sunt *Episcopi*, *Archidiaconi*, *Archipresbyteri*.

De *Episcopis*, *summo Pontifice*, &
Cardinalibus.

TIT. III.

E *Piscopi* dicuntur quasi speculatores, quod populorum sibi creditorum mores debeant speculari. *c. Cleros. vers. Episcopus. dist. 21.*

Sunt vel *simpliciter Episcopi*, & singulis civitatibus cum Diœcesi præsent, *c. 1. §. Episcopus. dist. 21.* vel *Metropolitani*, Archiepiscopi quandoque dicti, & singulis provinciis præsent; Qualis est, quæ decem aut undecim habet civitates: *c. scitote. 6. qu. 3.* Vel *Archiepiscopi* seu *Primates*, quibus *Metropolitani*, cæterique ejus provinciæ *Episcopi* subjiciuntur. *d. c. 1. dist. 21.* Aliquando *Patriarchæ* dicuntur. *c. in illis verò civitatibus. 2. per tot. dist. 80.*

Hi tamen propriè hodie sunt quatuor *Episcopi*, primum post summum Pontificem locum obtinentes: hoc videlicet ordine: *Constantinopolitanus*, *Alexandrinus*, *Antiochenus*, *Hierosolymitanus. c. antiqua. 23. de privileg. dist. 22. in sum. ubi Gl. & per tot.*

Omnes *Episcopi* habent ligandi solvendique potestatem; & visitandi deligentiam. soli in Ecclesia sacrum chrisma conficiunt, Dei altaria & Ecclesias consecrant, pollutas repurgant. Clericos ordinant, suspendunt, deponunt; delinquentes excommunicant. Purgationes indi-

cunt, dispensant, solennes pœnitentias imponunt. *c. 1. vers. ad Episcopum. dist. 25. c. quamvis. 4. dist. 68. & 26. qu. 6. per tot.*

In Episcoporum ordine & *summus Pontifex* censetur; sed potestatem cæteris habet majorem, *c. decreto. 12. qu. 6. in fin. c. qui scit. ead. qu. c. multum stupeo. 8. ad fin. 3. qu. 6.*

Omnes enim judicat, à nemine judicatur, excepto Concilio generali, & in causa hæresis: *c. mandastis. 10. ubi Gl. verb. potuissim. 2. qu. 5.* Solus quæstiones de fide, majoresque Ecclesiæ causas decedit: Concilia, eorumque scripta approbat: Synodum generalem congregat: Episcopos Electosque transfert, & eorum sedes mutat: ipsos deponit; depositos restituit: cessiones ab ipsis accipit: eos, ne cui alii quàm Sedi Apostolicæ parere teneantur, eximit: Episcopatus duos unit; unum partitur: vota commutat: illegitimos dignitatum capaces reddit: appellationes ad se, mediis omissis, interpositas admittit; de iis cognoscit: sententias nulli appellationi subjectas fert. *c. 2. de transl. Episc. & c. quod translationem. 4. de offic. leg. ubi Gl. & c. sicut unire. 8. de excess. Pralat.*

Eligitur ex corpore Cardinalium. *c. oportebat. 3. & c. seq. 79. dist.*

Cardinales sunt tanquam Senatores Pontificis, seu Senatus Ecclesiæ. *c. Ecclesia. 7. c. 16. qu. 1.*

Sunt alii *Cardinales Diaconi*, alii *Cardinales Presbyteri*, alii *Cardinales Episcopi*, habitâ ratione titularum quibus insigniuntur.

Singuli in suis titulis sibi decretis habent Jurisdictionem pene Episcopalem; quia & tituli illi Ecclesiis seu parochiis Episcoporum comparantur. *c. his quæ pro. 11. de major. & obed. c. ex gestis. 2. de cleric. non resid.*

Numerus Cardinalium non est definitus; sed summi Pontificis arbitrio, à quo eliguntur, augetur, vel minuitur.

Eligi debent scrutinio & consensu Cardinalium de vi-

ro probo, moribus bonis insignito, justis natalibus orto, ætatis triginta annorum, qui non sit nepos ex fratre vel sorore summi Pontificis, vel Cardinalis. *Secundum Synod. Basil. §. fin. de num. & qual. Card. in pragm. sanct.*

Cardinales omnes, olim bis in hebdomade in Consistorium apud Pontificem conveniebant; hodie tantum semel.

In Consistorio proponuntur & deciduntur controversiæ electorum ad Episcopales Ecclesias. ubi Ecclesiæ vacant, ad quem electio pertinet, discutitur. per illud ad beneficia consistorialia, id est, quæ Sedi Apostolicæ reservata, præpositi eliguntur; in illo omnia quæ ad cultum divinum, ac fidem Christianam, religionem, & pacem orbis Christiani, & conservationem temporalem Ecclesiæ Romanæ pertinent, tractantur. *Tholos. in syntagm. jur. univ. lib. 15. c. 4. num. 15.*

Cardinales, Sede Pontificatus vacante, Ecclesiam regunt. *Idem d. loc.*

De Electione.

TIT. IV.

Quia modò per *Electionem*, modò per *Postulationem* Episcopi ac cæteri Prælati promoventur, *c. 3. in fin. c. 4. §. cæterum. de postul. Prælat. c. innotuit. 20. c. scriptum. 40. de elect.* ideo de his duobus promovendi modis dicendum; & primum de *Electione*.

Electio, est alicujus personæ idoneæ ad prælationem, vel fraternam societatem, canonicè facta vocatio. *Hostiens. in §. 1. & Gl. in c. 1. in ver. vera postulatio. de postulat. Prælat. in 6.*

Pertinet Prælati electio ad collegium, cui Pastor quaeritur, & ad eos qui pacto, vel privilegio, vel consuetudine hoc jus obtinuerunt; *c. 3. de caus. poss. & propr. c. ult. 16. qu. ult. Host. in §. quis possit. nisi jure eligere prohibeantur.*